

浙江文叢

管庭芬詩文集

〔下冊〕

浙江出版聯合集團  
浙江古籍出版社

浙江文叢

管庭芬詩文集

〔下冊〕

浙江出版聯合集團  
浙江古籍出版社

海寧市檔案局（館）  
海寧市史志辦公室 編  
〔清〕管庭芬著 虞坤林點校

雜著四種



# 海隅遺珠錄

## 序

去州治四十里而近元吉東鄉曰『路仲里』者，其水自桐溪、語溪而來，至此稍渟滯紆徐，以會於洛塘，故亦名『渟溪』。並溪而居者百十家，有梓樹大可十圍，矗立市廛中，則管氏之萬拓堂也。余嘗以事至焉，與芷湘茂才夜坐話舊，爲言其祖自宋時始居於此，明成化間董從吾道人嘗來講學，爲顏其堂，蓋里中故家莫先管氏者矣。芷湘少承祖父之訓，以一州文獻爲己任，既成《海昌經籍志》，又萃里中先哲詩文若干家，自撰《渟溪雜詩》四十首附其後。自明中葉始成聚落以來，至今墜簡逸聞咸在，而管氏累世撰著亦略具於斯。余受而讀之，竊歎管氏諸老人與其鄉先生於荒村老屋中，謝絕塵事，把卷自怡，未嘗求知於人，而皆能有傳於後。若市東北蕭家浜相傳爲尚書故宅者，尚有舉其名字者乎？而吳經歷、張布衣之好義，胡德甫、錢氏兩孝子之至行，日在齒頰間，即寥落不偶如石泉村詩人謝煜舒，人猶憐之，其故何也？芷湘其知之矣。於戲！微芷湘，孰使我徘徊於秋水庵前，慨想數百年風氣之古、人文之盛也哉？道光十有四年冬，甘泉鄉人錢泰吉題於海昌學舍之可讀書齋。

序

吾邑之以詩名者，明則蘇雪溪、陸辛齋，國朝則查初白三人而已，外此或以德行著，或以節義著，或以文章著，詩未嘗不工，所重不在詩也。乾隆戊寅，邑有修志之舉，丙申續纂。秉筆者不得其人，去取鮮當。先子曾有《寧志餘聞》之作，於搜輯之餘，錄《海昌詩繫》一冊，自齊顧歡、唐許遠，迄明得三十餘家，其人皆卓卓可傳，詩亦溫厚和平，有三百篇遺意，特詩以人重，人可傳詩，特其餘技耳。余家自元初占居洛塘北，即路仲里，均在邑之東北隅。一時人才輩出，詩文社會無虛日，然風氣淳樸，每以讀書敦品相勗，以營求干進爲恥，往往多隱君子居其中。迨風流閭寂，子姓氏微，斷簡殘編，半歸零落。同里管子芷湘，幼稟異姿，恪承庭訓，甫成童，即以詩見稱。又喜搜錄鄉先輩舊事，嘗輯《海昌經籍考》，頗爲詳備，暇復輯《海隅遺珠錄》二冊，後附《淳溪雜事詩》五十餘絕。是錄也，錄其人，並繫以傳；錄其詩，並附以文。如吳若谷之《孝友傳序》、管竹溪之《朱節孝詩》、錢綠窗之《書佩刀歌後》、管月楣之《張布衣傳》，悉有關於世道人心，人可傳，藉詩文以傳，詩文無可傳人之名，藉附于他人之詩文以傳，非如詩鈔詩選，徒以翡翠荇蘭，紛若悅目已也。嗚呼！有論世知人之識，有徵文考獻之功，管子之心苦矣，管子之功偉矣。若精於論詩，不問其人，陸平原失身逆藩，潘安仁党於賊后，王摩詰儲公汙祿山僞官，皮逸少受黃巢官，詩非不可傳，其人余因無取焉。癸巳秋孟，竹泉氏周勳懋識於種松山館。

## 題辭

硤川蔣光煦生沐

十步有芳草，古人喻賢士。淹沒隨蓬蒿，表彰賴後起。乃或甘隱淪，名不出鄉里。翻愧好事流，吊譽及朱紫。況此千秋業，豈欺後人爾。淳溪邑一隅，敦槃夙挺峙。管君不遺力，搜羅編桑梓。輶軒所未及，擊壤聊存始。請看梨棗間，誰貴洛陽紙。

## 論例八則

淳溪峙海昌之北鄙，距桐石境咫尺相望。小市荒村，聞有明中葉時始成聚落，其中一二故家士族寧守陳編，不聯聲氣，或寄情於五字七字之間，終老牖下。所以自來輯錄志乘者人物掌故咸從略而不詳。昔人以小桃源擬之，非虛語也。

國初尚承前明餘習，學士聞人每結社一方，各以詩文相尚。陸冰修先生昆季，曾於吾鄉創立洛溪吟社，兼有同社新詩之選，淳溪逸老遺民，定多傑構。惜百餘年來，陸氏子姓氏式微，先人手澤不能珍守，盡湮於蛛絲蟬粉之間，不僅詩文莫採，兼之姓氏弗彰，亦可悲夫。

淳溪遠隔邑治，地非衝衢，兼無名勝，以故高賢題詠集中罕有及之。然而戶戶栽桑，村村種水稻，香拂徑，柳蔭圍溪，誰謂寥寂之區，不可卜居借隱乎？且士無輕去其鄉，樂貧守拙，而弦誦之聲依然不墜，似與他處稍勝一籌。

余鄉詩文可足徵信者，惟洛塘周氏族譜，以及吾家宗乘，皆附《藝文》數卷。今輯是冊，半藉此爲藍本。昔年阮芸臺先生撫浙時，有《兩浙輶軒詩錄》之選，特屬邑之人士博徵，以闡揚潛德。先君子曾慎擇里中詩人古近體諸作數十篇，擬附驥尾，奈不滿司事者所欲，皆格而弗進，並原稿亦亡之矣。今欲覓無從，頗爲缺陷。

去春，余自潞河歸，適聞汪小米孝廉搜求杭郡逸詩，學師錢深廬夫子命鈔家集一卷，郵寄武林，聞已入選。因復於殘篇斷卷剩紙廢墨中，搜得鄉先哲詩文若干，時逼嚴冬，尚未詮次。今歲安硯泮江，聽雨無聊，匯成一集。凡邑乘外志及諸家雜記，有涉閭里佚聞者，并夾註於小傳之下，而鄙人案語亦間附之。此即《海隅遺珠錄》之緣起。

昔杭堇圃先生輯《詞科掌錄》、阮中丞著《定香亭筆談》，皆詩古文雜收，余此編亦間選一二，至於以詩存人，以人存詩，此系選家通例，並仍不易。若前輩達尊傳中直書其名，則亦史家臨文不諱之意，事雖謬妄，閱者祈諒之。

余此錄成一隅之區文獻，似無遺憾。然故老舊聞，齊東野語，皆不能偏廢，復拈淳溪詩四十絕，以概其餘。此卷重注不重詩，蓋歌詠之中，而寓紀載之意，至於掛漏，終所未免。

集中詩古文，僅從家塾所存舊時手跡錄出，奈踟於見聞，不能博采，終屬草創，雖爲定本，設桑梓諸君子能惠假鄉先輩遺著命讀，雖吉光片羽，亦必鄭重而登續編。時道光癸巳孟秋，芷湘居士管庭芬書於泮江寓館之筆花吟榭。

# 目次

宋

管煥

元

周肇允

明

陸子孟

陸履台

周文燭

國朝

管文華

陸械

管式龍

周宏基

陸華

吳太冲

周文熒

吳農祥

管天錫

周奕

金王華

周甸

陸鈺

管俯

吳農復

周學舒

管虞廷

管攀龍

管銓

陸之瀚

周可權

陸銑

吳容

張孚觀

管汝錫

周啟祥

陸嘉淑

陸士鈺

吳爽

周恕

周璟

吳繼志

陸宏定

管宏淳

管鳳苞

周惓

周思

周偉 管捷 陸攀堯 周復 管鳳岡填諱許鎮

卜麟 胡啟龍 管聯 周大業 管鳳翽 管應祥

張宗華 朱瑟纘 張炎 朱沅蘭 周光朝 金勝

周廣業 管廷對 謝人麟 卜廷尊 管學詩 管忠彥

金海鯨 管謙 管升 朱龍浦 胡珠 胡璜

周雋業 錢成熙 錢馥 錢清 管題雁填諱許冲之

卜謀 許樹穀 許樹棠 管廷鑒 張蘭 金麟趾

金應 金麟士 陶鈞 管廷鏗 管朝誦 周勳懋

周勳伊 周勳常 管嗣許 胡爾榮 管世灝 管宸遴

周在恩 陸鎔 胡一枝 胡本 管純 孫祖珍

朱作豐 錢焯 卜周書 卜周易 周升墀 許元燮

閨淑

吳爾貞 朱氏 陳賢 楊氏

緇流

釋月新 釋超宗 釋實懿

羽客

錢選  
陳真濂

附

周鏘

淳溪雜詩  
附

目次

七六九

## 海隅遺珠錄

南宋

**管煥** 字未詳。本姚江人。南宋初特奏名科進士，馳情高蹈，不樂仕進，因隱居邑之路仲鄉，管氏之遷於海昌者，自公始也。著述失傳，僅於家乘中得其《聽琴》一首，云從吳由《續修海昌圖經》內錄存。

### 月夜聽隱者琴

松風拂弦，響激泉石。俯仰太虛，山空月白。

芬謹案：州乘，南渡《選舉》附存特奏名諸進士，公與蘇友直、聞人藻三人俱云見《圖經》，年次無考。然邑令胡旣作《圖經》在紹興八九年，後令潘景夔《續圖經》在開禧二三年，則公爲寧宗以前人可知矣。至於咸淳間吳由任海昌，嘗與邑人楊均重輯《圖經》，斯時立國已百二十年，科目有條不紊，何至時次無考？且聞人藻下直接淳熙二年榜特奏名于恕，則三人者可定爲孝宗以前人無疑矣。

元

**周肇胤**

字仲潢。世居錢塘。父宣，字功猷。仕宋，爲尚書職方郎。德祐間，元兵陷臨

安，轉門力屈遇害，母趙氏隨父死節。文信國有詩哭之。公年五歲，賴奴安兒得依叔于鹽官，隱居洛塘之方全村，遂家焉。豐膺徵辟，終身不受元祿，以布衣終，卒年八十有九。著有《孝經》《忠經注義》各一卷，又《周氏世乘》、《待清遺稿》若干卷。

**游惠力寺**

侵晨入山寺，山色靄微茫。峰巒蔭喬木，深徑生夏涼。老僧聞客到，掃徑開松堂。沿廚接檻溜，烹茗兼蕨香。啣花想鹿女，獻菓擬雁王。假榻倚空翠，流夢聞笙簧。竹風何泠泠，吹潤滿衣裳。樂此錄清供，因<sub>〔二〕</sub>不知山日長。悟深無生理，身心祇兩忘。好問塵中士，今古何茫茫。此詩得之寺僧，已采入《浙江通志》。

**答友**

故人勿復問行藏，舉目荆榛萬感傷。滄海變來身世異，赤龍潛後水天荒。乾坤有恨家何在？草木無知歲自芳。每念孤忠九原下，不堪灑淚向斜陽。

案，周氏譜傳云：仲潢公子毅，舉賢良方正。曾孫益，於所居植梅數畝，構梅隱軒。永樂甲辰輸粟賑饑，授登仕郎，其分居洛塘南北者，皆公子姓也。明中葉後，宗子爲怨家所中，屋廬盡毀，今俗稱『廿四畝頭』是其遺址，夷治爲田，中有石隆起四尺許，畚鍤不敢近，犯者禍立至，土人比之息壤焉。又，《張待軒集》云：洛塘周氏，元末鬻膠飴爲業，子仲潢發藏金助餉，授將仕郎，不受。此與譜傳互異，並存俟考。

### 悲感

干戈蒙世難，常憶在童年。一哭親朋盡，千辛姓氏全。鶯花憐避地，雲水沒長天。帝里荒煙外，啼眸望欲穿。

### 寫懷

野心得真賞，風日生午晴。囊有三尺劍，耿耿浮龍精。君父多舊恨，莫從效忠誠。凡書必甲子，邈矣懷淵明。養閒數十載，閉關無雜營。適足僅容膝，物意涵道情。隣翁日相過，開樽解餘醒。箕山與桐水，嫌留遺世名。

## 西湖懷古

十二橋涵萬頃秋，鏡光明映酒人樓。花凝粉黛香旋滅，柳蹙蛾眉淚暗流。激石水聲猶帶憤，過山雲影尚含愁。物情總是悲行在，莫向斜陽問去留。

## 過御教場

故宮春雨泣蒿萊，不耐尋游眼倦開。滿地苔花殘碣沒，傍人燕子舊巢摧。耕兒偶爾逢遺鏃，野老何心問劫灰。想像翠華無處所，毀牆陰裏鳥聲哀。

## 初家洛塘

遯世難忘君父恩，逃名偏得隱人村。數椽茅屋居初穩，幾卷韋編道覺尊。俗厚幸隨歌壤老，溪深奚羨武陵源。惟期降辱無由及，傲潔清狂未敢言。

附金履祥《贈高士仲潢》詩云：『徵詩幾向日邊過，謝卻紅塵倚碧蘿。只恐衣冠猶改節，誰能草野薄鳴珂。閒中風月吟邊出，醉後煙霞夢裏多。裂眦不知螳臂弱，好思博浪復山河。』

又，貢師泰《過仲潢草堂》詩云：『真成宋室老遺民，碩果天教作隱淪。東海素逃連仲志，西山不辱伯夷身。悲歌當泣長因醉，笑傲忘年到處春。今過草堂親仰止，自慚骯髒尚風塵。』

並見《餘聞》。

明

陸子孟 字養浩，號求吾，又號介庵。洪武乙丑進士。《陸氏家乘》云：『由貢生應會試』。《外志》作『甲子舉人』，恐誤。官至刑部侍郎。

曹氏宗載《紫硯文獻錄》云：考《陸氏家乘》，先生爲辛齋叟從祖。少居硯，元末遭亂，避地潯鎮西，今陸家亭其故址也。嘗游方正學之門，官秋曹時，冰心鐵面，風節凜然。邑志僅列《選舉》，不爲列傳，殊爲闕事。稿久散佚，茲從友人處借得辛齋手錄雜詩一冊，尚存三首，亟爲錄存，吉光片羽，彌見珍愛。

暮春

垂楊垂帶卷重樓，單戶濃陰綠漸稠。自訝芳辰銷藥石，不禁花事老汀洲。閉門風雨經時卧，故國烽煙萬里愁。莫到最高原上望，江南春已不堪留。

雨窗

夢裏鄉關客裏身，厭聞簷溜滴經旬。鶯花已是難除悶，風雨何須更妒春。大有商量營壘燕，絕無聊賴倚樓人。不情天氣初長日，獨自支頤岸角巾。

## 白蓮

誰將冰雪淨炎暉，虛白相生靜與依。可是鉢中傳化象，還從華頂得清機。水邊影漾神彌淡，月下香來氣自微。每望素姿難寫取，晶盃玉盃覺全非。

## 陸華

字德英，號實齋。由進士，官終兵部侍郎。始自仁和遷居接濟村。

案《陸氏家乘》作宣德丙辰進士。然宣德無丙辰，丙辰爲正統元年，王簡可撰《辛齋年譜》並仍其誤。今考《宣德正統兩朝進士題名碑錄》及《仁和縣誌》，俱無華名，《陸氏家乘》及王譜未知何據。

## 移建宣公祠於接濟村落成紀事

衣冠唐代盛，肅祀薦繁蘋。移主湖山地，專祠洛水濱。萬言存諫疏，奕世表純臣。堂構初成後，虔昭俎豆新。

## 周甸

字惟治，號亭山，易之子。幼慧悟，邵康僖見而奇之，受《易》經，補邑諸生，兩中

副車，迄無所遇。旋游姚江王文成之門先後十年，盡獲心學之傳。及文成奉命討岑猛，將行，